

16 Julai 2010 (Jumaat)

Pasir: Selangor digesa bubarkan KSSB

Oleh NOR SEDEK ISMAIL pengarang@utusan.com.my

SHAH ALAM 16 Julai - Kerajaan negeri didesak membubarkan Kumpulan Semesta Sdn. Bhd., (KSSB) yang melakukan aktiviti perlombongan pasir di negeri ini dan mengembalikan pemberian permit melombong menerusi Pejabat Tanah dan Daerah. Penaung Jawatankuasa Bertindak Pengusaha-pengusaha Pasir Melayu Selangor, Datuk Tengku Shaiffuliazan Tengku Zainal Abidin menegaskan, tindakan itu perlu dilakukan segera kerana KSSB yang ditubuhkan dua tahun lalu tidak telus dalam pemberian kontrak melombong pasir kepada kontraktor. Tambah beliau, keadaan bertambah buruk apabila kuasa monopoli syarikat tersebut menyebabkan semua pengusaha pasir Melayu di negeri ini gulung tikar kerana royalti RM5 hingga RM6 satu tan yang dikenakan adalah terlalu tinggi. "Kita mahu KSSB ditutup. Kerajaan negeri perlu mengembalikan kuasa pemberian permit mengeluarkan pasir untuk tanah persendirian kepada pentadbir tanah dan daerah. "Langkah itu lebih adil kepada pemilik tanah yang mengeluarkan kos di atas tanah milik mereka serta telah membayar cukai dan premium," ujarnya. Beliau berkata demikian pada sidang akhbar yang turut dihadiri kira-kira 50 pengusaha pasir Melayu Selangor di sini hari ini. Tengku Shaiffuliazan menambah, KSSB menekan pengusaha-pengusaha terlibat apabila menetapkan syarat deposit sehingga RM300,000 selain kos-kos lain yang telah dikeluarkan oleh pemilik tanah.

Kesannya, jelas beliau, tiada pengusaha pasir Melayu yang mampu memenuhi syarat tersebut kerana tidak memiliki modal besar seperti kontraktor bangsa lain. "Sepatutnya kerajaan negeri memperakui kemampuan dan kuasa perundangan pentadbir tanah dan daerah di dalam menguruskan segala permit mengeluarkan dan memindahkan bahan batuan di dalam daerah pentadbiran masing-masing. "KSSB pula hanya diberi kuasa menguruskan permit pasir untuk tanah-tanah milik kerajaan sahaja," ujarnya. Tengku Shaiffuliazan berkata, Menteri Besar, Tan Sri Abdul Khalid Ibrahim perlu mendengar luahan para pengusaha pasir Melayu jika betul-betul ikhlas mahu membuat perubahan dalam industri perlombongan pasir di Selangor. Tegasnya, kewujudan syarikat monopoli menguruskannya seperti pernah dilakukan semasa Barisan Nasional (BN) dahulu tidak mendatangkan manfaat besar kepada pengusaha dan masyarakat kerana ia telah dipolitikkan. "Ekoran itu walaupun ada KSSB tetapi sebenarnya tidak ada perubahan dalam usaha membasmi kegiatan melombong pasir secara haram di negeri ini," ujarnya.

16 Julai 2010 (Jumaat)

Kes curi pasir di bawah bidang kuasa PBT - Polis

SHAH ALAM 16 Julai - Kerajaan Selangor diminta menyerahkan siasatan kes kecurian pasir yang berlaku di negeri itu kepada penguat kuasa pihak berkuasa tempatan (PBT). Ketua Polis negeri, Datuk Khalid Abu Bakar (**gambar**) berkata, ini kerana siasatan kes kecurian pasir bukan di bawah bidang kuasa polis dan perkara itu telah dipersepuji sejak sekian lama. Beliau berkata, polis hanya akan membantu sekiranya ada permintaan daripada pihak PBT, itu pun jika kes yang dilaporkan berkait dengan jenayah. "Dalam mesyuarat yang dijalankan bersama pihak Setiausaha Kerajaan Negeri minggu lalu, juga disebut bahawa siasatan kes curi pasir adalah di bawah PBT. "Jadi kita harap kerajaan negeri faham perkara ini dan mintalah pihak PBT melakukan siasatan atau tubuhkan sendiri pasukan khas dengan kerjasama PBT kerana itu memang bidang kuasa mereka," katanya ketika dihubungi *Utusan Malaysia* di sini hari ini.

Kerajaan Selangor yang dilihat gagal menangani isu kecurian pasir di negeri itu kini cuba menyeret Kerajaan Pusat dalam kontroversi tersebut. Ia terbukti apabila Menteri Besar, Tan Sri Khalid Ibrahim kelmarin berkata, kerajaan negeri telah mengemukakan surat kepada Timbalan Perdana Menteri, Tan Sri Muhyiddin Yassin bagi meminta kerjasama Kerajaan Pusat membantu menyelesaikan isu tersebut. Selain Muhyiddin, Abdul Khalid memberitahu, surat berkenaan turut dikemukakan kepada Khalid, Menteri Dalam Negeri, Datuk Seri Hishammuddin Tun Hussein, Ketua Polis Negara, Tan Sri Musa Hassan dan Peguam Negara, Tan Sri Abdul Gani Patail. Mengenai surat yang dikatakan telah dihantar oleh Menteri Besar kepada beliau kelmarin, Khalid berkata, surat itu baru diterimanya petang semalam.

Ujar beliau, dalam surat itu yang dihantar ke pejabatnya, turut dikepaskan beberapa laporan polis yang dibuat oleh Kumpulan Semesta Sdn. Bhd. (KSSB). Antara laporan tersebut, dakwaan kumpulan itu dihalang oleh Orang Asli untuk mengorek pasir di Olak Lempit, Kuala Langat, kecurian pasir di beberapa lokasi dan pondok di tempat korek pasir dibakar. Turut disertakan kata beliau, satu surat yang antara lain meminta supaya kes kecurian pasir disiasat secara profesional oleh pihak berkuasa. "Itulah surat yang kononnya dihantar kepada saya, Ketua Polis Negara dan Timbalan Perdana Menteri, dan laporan polis yang banyak itu seolah-olah nak beritahu yang kita tak jalankan siasatan. "Saya ingin maklumkan yang dalam banyak-banyak laporan itu hanya kes pondok terbakar sahaja yang polis siasat kerana ada unsur khianat. Kes-kes lain sepatutnya disiasat oleh PBT," jelas beliau. Sehubungan itu, kata Khalid, beliau menasihatkan Menteri Besar dan kerajaan negeri segera menubuhkan pasukan penyiasat di bawah PBT agar kes curi pasir di negeri ini dapat ditangani dengan baik.

19 Julai 2010 (Isnin)

PAC Pulau Pinang adakan inkuriri siasat kes curi pasir

GEORGE TOWN 19 Julai - Jawatankuasa Kira-kira Awam (PAC) Pulau Pinang akan mengadakan inkuriri untuk menyiasat aktiviti mencuri pasir di Kampung Kenanga, Balik Pulau di sini. Pengerusinya, Jagdeep Singh Deo, yang juga Anggota Dewan Undangan Negeri (ADUN) Datuk Keramat, berkata, PAC akan mengadakan mesyuarat Rabu ini bagi menentukan pihak yang akan dipanggil untuk membantu siasatan. "Antara pihak yang mungkin akan dipanggil ialah beberapa agensi kerajaan untuk membantu mencari pihak yang bertanggungjawab dalam aktiviti mencuri pasir itu," katanya kepada pemberita di sini, hari ini. Katanya, PAC akan menyiapkan siasatan itu secepat mungkin bagi mengelak orang ramai membuat pelbagai spekulasi berhubung perkara itu. Beliau berkata pihaknya akan turut melawat kawasan terlibat dan siasatan dijangka siap dalam tempoh sebulan. "Orang ramai yang mempunyai maklumat diminta tampil untuk membantu siasatan," katanya. Jagdeep berkata, setakat ini, pihaknya tidak menerima sebarang laporan mengenai aktiviti mencuri pasir di kawasan lain di negeri ini. Minggu lepas, laporan akhbar mendedahkan tapak politeknik di Kampung Kenanga itu, diceroboh pencuri pasir. Menurut laporan itu, setiap malam berpuluhan-puluhan lori keluar masuk ke kawasan itu mengambil pasir untuk dihantar ke lokasi yang tidak dipastikan.

20 Julai 2010 (Selasa)

Parlimen - Agensi, jabatan kerajaan didakwa tidak hayati agenda PM

KUALA LUMPUR 20 Julai - Agensi-agensi dan jabatan kerajaan hari ini ditegur kerana tidak mematuhi dan menghayati semangat Pelan Transformasi Kerajaan (PTK) yang digariskan Perdana Menteri, Datuk Seri Najib Tun Razak. Ahli Dewan Negara, Senator Datuk Akbar Ali berkata, perkara tersebut amat serius kerana ia boleh mengganggu kelancaran Rancangan Malaysia Kesepuluh (RMK-10) yang mana kejayaannya bergantung penuh kepada integriti, pentadbiran baik dan sistem penyampaian yang cekap. Katanya, agensi dan jabatan kerajaan perlu merombak beberapa prosedur yang tidak membantu kelancaran PTK seperti pembahagian dan pengagihan tugas yang dilihat amat liat untuk diperbaiki. Contohnya, kata beliau, Jabatan Akauntan Negara perlu mengagihkan bidang kuasa mengeluarkan dan menandatangani cek peruntukan kepada Jabatan Kebajikan Masyarakat supaya cek untuk orang sakit dan miskin dapat disegerakan. "Bagi jabatan itu, semua cek dilihat sama sahaja tanpa mengira orang miskin atau sakit. Semuanya dibuat ikut giliran bukannya berdasarkan keperluan mendesak. "Sedangkan bagi orang miskin RM10 hari ini lebih baik daripada RM1 juta pada esoknya. "Pernah berlaku seorang nenek yang menderita sakit kanser meminta bantuan tetapi selepas enam bulan langsung tidak dijawab. "Saya berjumpanya dan menghulurkan sedikit wang, dia kelihatan amat pilu ketika menerimanya, duit itu dipegang dan disimpan elok-elok. Esoknya dia meninggal dunia," katanya. Beliau membahaskan RMK-10 pada sidang Dewan Negara hari ini. Akbar menarik perhatian sidang Dewan Negara dengan berkata: "Dengan keadaan ini macam mana rakyat hendak sayang kepada kita iaitu kerajaan? "Sedangkan perkara ini yang bersungguh-sungguh dimahukan oleh Perdana Menteri tetapi tidak pula dilaksanakan oleh jabatan dan agensi kerajaan." Beliau juga menegur kewujudan jurang perbezaan besar dalam segi pembangunan antara bandar dan luar bandar, sesuatu yang diwarisi daripada penjajah. "Bekalan air sebenarnya datang dari luar bandar tetapi masalahnya orang bandar dapat air bersih tetapi orang luar bandar tidak.

22 Julai 2010 (Khamis)

Parlimen - Kementerian Pertahanan sahkan pembelian radar pasif tercanggih

KUALA LUMPUR 22 Julai - Kementerian Pertahanan hari ini mengesahkan pembelian dua unit radar pasif tercanggih yang pernah dicipta sehingga kini iaitu Vera-E, dari Republik Czech bernilai RM72.5 juta. Timbalan Menterinya, Datuk Dr. Abdul Latiff Ahmad berkata, pembelian itu yang sebelum ini diklasifikasikan sebagai sulit bertujuan memenuhi keperluan pengawasan ruang udara negara secara berlapis. "Hasil daripada pembelian ini kita memperoleh pemindahan teknologi dalam sistem peperangan elektronik," katanya dalam ucapan penangguhan perbahasan Rancangan Malaysia Kesepuluh (RMK-10) bagi Kementerian Pertahanan di Dewan Negara hari ini. Berbanding radar konvensional yang kedudukannya mampu dikesan oleh peralatan elektronik pesawat musuh, Vera-E mempunyai kemampuan untuk mengawasi ruang udara secara pasif (tanpa dapat dikesan kembali oleh musuh) secara 360 derajat dan sejauh 450 kilometer. Kelebihan dan kecanggihan itu membolehkan mana-mana negara yang mengoperasikannya membuat persediaan awal untuk mempertahanan dan menembak jatuh pesawat penceroboh tanpa disedari oleh pihak musuh. Ekoran itu, Amerika Syarikat telah melarang Republik Czech daripada menjual radar itu kepada negara yang dianggap bukan sekutu yang boleh menjadi ancaman kepadanya termasuk Pakistan, China dan beberapa negara Asia Barat.

22 Julai 2010 (Khamis)

Korek pasir Sungai Ular berleluasa

Oleh OPAT RATTANACHOT uspetani@utusan.com.my

KULIM 22 Julai - Belum pun reda kes kecurian pasir di Selangor dan Pulau Pinang, penduduk Kedah pula dikejutkan dengan kegiatan mengorek pasir sungai yang dikesan berleluasa di Sungai Ular dekat sini. Kegiatan mengorek pasir secara tidak terkawal sepanjang jalan yang menghubungkan bandar Kulim ke Pekan Serdang itu sejak lebih setahun lalu mengundang bahaya kepada pengguna jalan raya apabila tebing sungai runtuh akibat hakisan. Sungai itu yang pada asalnya jernih dan boleh digunakan untuk tujuan pengairan di kawasan kebun juga semakin tercemar dan berkeladak. Lebih membimbangkan, kegiatan mengeluar pasir sungai berkenaan telah menyebabkan hakisan teruk dan kedudukannya saban hari makin hampir dengan laluan antara Kilometer 8 dan 12 di Jalan Kulim-Serdang. Naib Pengurus Barisan Nasional (BN) Bahagian Kulim/Bandar Baharu, **Chua Teng Ghee** berkata, kegiatan berkenaan jika terus dibiarkan akan meninggalkan kesan buruk terhadap pengguna jalan raya. "Tebing jalan raya makin runtuh dan terlalu hampir. Di Kilometer 7 Jalan Kulim-Serdang dekat sebuah kuil Hindu, jarak antara sungai adalah hanya kira-kira tiga meter. "Kita bimbang ia runtuh terutama ketika musim tengkujuh," katanya ketika ditemui pemberita selepas meninjau kawasan terbabit di sini hari ini. Teng Ghee yang juga Ketua MCA Bahagian Kulim/Bandar Baharu memberitahu, pihaknya difahamkan kegiatan mengorek pasir itu mendapat kelulusan daripada kerajaan negeri atas alasan membersihkan sungai. Bagaimanapun, katanya, para pengusaha dikatakan mengambil kesempatan untuk mengeluarkan pasir sungai bagi tujuan projek pembinaan di kawasan Taman Teknologi Tinggi Kulim. "Kita tidak membantah jika ia digunakan untuk tujuan pembangunan. Namun apa yang dikesali kegiatan ini makin berleluasa dan dibiarkan tanpa sebarang pemantauan sehingga menjaskan alam sekitar serta tebing sungai," katanya.

Beliau berkata, kerajaan negeri dan agensi berkaitan sepatutnya mengkaji semula pengeluaran permit tersebut bagi mengelak kejadian tidak diingini berlaku pada masa akan datang. "Saya sudah panjangkan kes ini dalam mesyuarat Jawatankuasa Pembangunan Daerah Kulim yang dihadiri pihak Jabatan Kerja Raya (JKR), Jabatan Pengaliran dan Saliran (JPS) serta Pejabat Tanah Kulim," jelasnya. Jurutera JPS Daerah Kulim/Bandar Baharu, **Mohd. Khuzai Khussani** ketika dihubungi memberitahu, pengeluaran pasir di sungai itu dilakukan di tanah milik Perbadanan Kemajuan Negeri Kedah (PKNK) dan JPS tiada peruntukan undang-undang untuk menghalangnya. Katanya, permit pengeluaran pasir itu dijalankan sejak beberapa bulan lalu dengan kebenaran Pengarah Tanah dan Galian (PTG) negeri. "Tanah sekitar kawasan ini dimiliki PKNK melalui anak syarikatnya Kulim Hi-Tech Park Corporation (KTPC). Pasir di sini dibekalkan untuk kegunaan projek pembangunan di Taman Teknologi Tinggi Kulim. "Kita telah cuba menyuarakan kebimbangan mengenai impak alam sekitar yang akan timbul tetapi tidak diendah," jelasnya. Sementara itu, seorang penduduk dari Ladang Sungai Ular, A. Palani, 63, memberitahu, kegiatan tersebut dikesan berleluasa sehingga terdapat puluhan lori berulang-alik ke kawasan berkenaan setiap hari.

22 Julai 2010 (Khamis)

Rencana - Kakitangan awam perlu faham kepentingan inovasi

ADA sebab kenapa Perdana Menteri, Datuk Seri Najib Tun Razak berkata kakitangan awam perlu faham kepentingan inovasi. Kenyataan beliau mendapat liputan utama akhbar-akhbar tempatan semalam. Beliau menegaskan bahawa sektor awam tidak boleh mempunyai Napoleon Kecil yang tidak memahami inovasi. Dalam sejarah Perancis, Napoleon terkenal sebagai pakar strategi perang sehingga berjaya menakluk banyak negara. Namun, kegoaan dan nafsu untuk menjadi 'orang besar' menyebabkan Perancis dan negara-negara yang ditakluknya musnah. Mengkang ego dan nafsu segelintir kakitangan awam yang 'gila kuasa' sehingga gagal memahami kepentingan inovasi dalam sektor awam adalah satu perkara yang perlu diberi perhatian serius. Ia tidak boleh dipandang ringan dan segala perlakuan ke arah itu perlu dibanteras sejak dari awal lagi agar tidak menjadi barah, apatah lagi jika ia melibatkan soal kepentingan rakyat. Orang yang 'gila kuasa' banyak menjadi penyebab keruntuhan kepercayaan, kecemerlangan dan kejayaan yang telah dicapai. Dalam suasana politik dan ekonomi sekarang, tentulah setiap kakitangan awam di semua peringkat termasuk pembuat dasar perlu mahir dalam menguasai inovasi.

Percayalah, tanpa inovasi tidak akan ada sesuatu yang baru dapat dicipta. Proses mencipta memerlukan kreativiti dan dengan itu, setiap individu dalam sektor awam perlu menjadi seorang yang berinovasi dalam menggerakkan setiap unit atau jabatan masing-masing. Mungkin ramai tertanya-tanya kenapa soal inovasi dibangkitkan sekarang? Jika kita menyelak lembaran Kamus Dewan, perkataan inovasi merujuk kepada sesuatu yang baru diperkenalkan seperti kaedah, sistem, adat dan lain-lain. Elemen penting yang dikaitkan dengan inovasi adalah kreativiti. Justeru, memang tepat masanya Najib membangkitkan perkara itu sekarang kerana ia menunjukkan betapa seriusnya kerajaan mahu setiap rakyat meningkatkan kreativiti dalam membantu negara memacu ekonomi menuju sebuah negara berpendapatan tinggi. Kenapa ia penting? Ia kerana tanpa inovasi maka kaedah, cara dan amalan yang ada dalam sektor awam sekarang akan kekal tanpa sebarang kemajuan. Tidak ada kemajuan bermakna tidak akan ada sesuatu yang baru untuk dicipta dan dibanggakan. Sedangkan reka cipta terbaru dalam apa sahaja bidang amat diperlukan bagi membantu negara mencapai status negara maju.

Misalnya kakitangan sektor awam di jabatan pertanian perlu sentiasa berfikir dan kreatif dalam melahirkan teknologi terbaru untuk memudahkan pekerjaan dalam sektor pertanian sekali gus mencipta sesuatu yang baru yang dapat menjana ekonomi petani dengan lebih baik. Begitu juga, para pegawai di sektor perikanan atau industri perlu sentiasa berusaha untuk mewujudkan sesuatu yang baru demi membangunkan sektor masing-masing dengan reka cipta teknologi terkini. Hasil reka cipta itu bukan setakat membantu para pekerja dan golongan yang terlibat di dalam sektor berkenaan, malah dapat menjana ekonomi negara yang lebih kukuh. Namun begitu, tiada maknanya juga jika sektor awam begitu berinovasi tetapi dalam waktu yang sama, para pegawainya memiliki sifat-sifat Napoleon Kecil. Dengan memiliki sifat sebegini, maka segala kejayaan dan kecemerlangan yang dicapai menerusi inovasi akan hancur berkecaci bak kaca terhempas ke lantai. Kesannya amat negatif terhadap imej sektor awam itu sendiri. Ini kerana sifat-sifat yang dimiliki oleh Napoleon Kecil akan menyebabkan semua peraturan yang menyokong persekitaran sektor awam termasuk inovasi akan runtuh menyembah bumi. Sia-sia sahaja segala usaha yang dilakukan. Justeru, setiap kakitangan kerajaan perlu meningkatkan kefahaman terhadap inovasi bagi mewujudkan kerangka kerja, peraturan dan dasar yang dapat menyokong inovasi dan tidak membantut perkembangannya. Lakukan sekarang!

23 Julai 2010 (Jumaat)

Laporan Khas - Kursus palsu: Lebih 2,000 kes dilapor

KUALA LUMPUR 23 Julai - Nasib malang ramai pelajar ditipu institusi pengajian tinggi swasta (IPTS) seharusnya menjadi pengajaran kepada pelajar lain yang bercita-cita melanjutkan pelajaran. Berdasarkan maklumat daripada Gabungan Persatuan Pengguna Malaysia (FOMCA), sejak 2007 sehingga Mei lalu, sebanyak 2,192 aduan diterima oleh pihaknya berhubung pelbagai jenis penipuan di IPTS. Kebanyakannya adakan berkaitan status pengiktirafan kursus yang diambil termasuk penipuan kononnya mendapat akreditasi penuh daripada Agensi Kelayakan Malaysia (MQA). Itu baru yang diterima oleh FOMCA menerusi Pusat Khidmat Aduan Pengguna Nasional (NCCC). Dipercayai lebih ramai lagi pelajar yang tertipu tetapi keberatan untuk tampil membuat aduan. Setiausaha Agung FOMCA, Muhammad Shaani Abdullah berkata, antara aduan daripada pelajar ialah mengenai iklan mengelirukan mengenai program ditawarkan IPTS berbanding sehingga akhirnya menyedari mereka tertipu.

"Rata-rata aduan adalah berkaitan penipuan IPTS khususnya yang memperdayakan maklumat berhubung status pengiktirafan. "Sehubungan itu, kami merayu dan menasihatkan semua pelajar yang ingin melanjutkan pengajian supaya menyiasat terlebih dahulu latar belakang sesebuah IPTS," katanya yang juga Pengarah NCCC. Sementara itu, Presiden Persatuan Pengguna Subang dan Shah Alam (Cassa), Datuk Dr. Jacob George berkata, pihaknya menerima purata lapan aduan sebulan berhubung penipuan oleh IPTS. "Ini meliputi kes-kes program pengajian tidak diiktiraf, pembiayaan yuran pengajian mahal, penipuan tenaga pengajar serta kekurangan fasiliti. "Aduan paling banyak berkaitan pengiktirafan terhadap sijil, iaitu tiada akreditasi daripada MQA," katanya kepada *Utusan Malaysia*. Sehubungan itu, Jacob mencadangkan Kementerian Pengajian Tinggi lebih proaktif mengatasi masalah IPTS yang menawarkan kursus-kursus tanpa akreditasi serta 'tawaran-tawaran program palsu'. "Tindakan ini akan memberi teladan kepada semua pihak untuk lebih berwaspada menjalankan perniagaan serta menjadi panduan kepada orang awam memilih IPTS yang terbaik buat anak mereka," katanya.

24 Julai 2010 (Sabtu)

Laporan Khas -IPTS tipu kursus, pelajar putih mata

MENGGENGHAM segulung ijazah untuk melangkah ke alam pekerjaan merupakan saat yang dinanti-nantikan oleh setiap siswazah. Mereka menghabiskan masa bertahun-tahun dan wang ribuan ringgit di institusi pengajian tinggi (IPT) terutama swasta (IPTS). Namun, bayangkan betapa luhunya hati apabila mengetahui diploma atau ijazah di tangan sebenarnya tidak diiktiraf di negara ini. Universiti awam tempatan dan di negara maju seperti United Kingdom (UK), New Zealand dan Australia turut menekankan pengambilan pelajar yang sijil mereka mempunyai akreditasi bagi menyambung pelajaran. Persoalannya, adakah IPT khususnya IPTS beroperasi sekadar mengaut keuntungan sehingga mengabaikan kualiti pendidikan serta memperjudikan nasib ribuan penuntutnya. Wartawan Unit Khas Utusan Malaysia MUHAMAD AMIRUL AFIQ MASTOR, AZRAI MOHAMMAD dan ROSALINDA MD. SAID serta jurugambar HAYAT SUEET, MOHD. NOOR AMIN dan ABDUL NAZIR MOHAMED mendedahkan sikap tidak bertanggungjawab IPT terlibat yang menjadikan pelajar sebagai mangsanya. Pelbagai cara dilakukan oleh IPTS untuk memperdayakan orang ramai dan bakal pelajar termasuk membuat surat perakuan pengiktirafan daripada Agensi Kelayakan Malaysia (MQA).

KUALA LUMPUR 23 Julai – Awas! Jangan hanya ghairah mahu memasuki institusi pengajian tinggi swasta (IPTS) tetapi akhirnya berputih mata apabila mengetahui kursus diikuti tidak diiktiraf kerajaan. Pesanan jangan mudah terpedaya dengan tawaran kursus di IPTS ini perlu dihebahkan. Ini kerana banyak IPTS tidak jujur sebaliknya beria-ia menarik pelajar baru semata-mata mahu mengaut keuntungan. Sesetengah kurus yang ditawarkan tidak pernah atau belum mendapat akreditasi penuh Agensi Kelayakan Malaysia (MQA). Fenomena yang sering berlaku adalah IPTS ‘menjaja’ kononnya memiliki akreditasi sedangkan mereka hanya menerima akreditasi provisional atau sementara yang diberi MQA selepas penilaian awal. Sedangkan, maksud kursus diiktiraf adalah memiliki akreditasi penuh daripada MQA sebelum kumpulan pelajar pengambilan pertama menamatkan pengajian. Ada juga IPTS menipu dengan mengabui mata pelajar dengan mempromosi pengiktirafan MQA walaupun ia untuk kursus tertentu bukan keseluruhan yang ditawarkan. Oleh itu, luangkanlah masa menyiasat latar belakang IPTS dan program yang ditawarkan. Fikirkan bahawa memiliki sijil yang tidak diiktiraf membuatkan anda tidak ‘laku’ di pasaran pekerjaan.

Malah, sijil, diploma dan ijazah di tangan nanti tidak boleh digunakan jika berhasrat melanjutkan pengajian ke peringkat lebih tinggi termasuk ijazah sarjana dan doktor falsafah. Fakta MQA, sejak 1998 sehingga 1 Jun lalu, 413 program yang ditawarkan 158 IPTS ditolak permohonan akreditasi penuh mereka. Jika dianggarkan setiap program mempunyai 100 pelajar, maka lebih

- ② IPTS ‘berpesta iklan’ tawar kursus sijil, diploma dan ijazah dengan bayaran murah. Tetapi banyak yang menipu kononnya sudah dapat akreditasi penuh MQA.
- ② Taktik ‘tangguh’ permohonan akreditasi supaya pelajar ‘diikat’ sambung belajar di kolej sama.
- ② Lebih 2,000 aduan pelajar kes kursus tidak diiktiraf diterima FOMCA. Cassa pula terima purata 8 aduan serupa sebulan.
- ② Cerita mangsa-mangsa sijil tak laku di pasaran kerja.

24 Julai 2010 (Sabtu)

Curi pasir: Pegawai kerajaan negeri didakwa bersubahat

PUTRAJAYA 24 Julai - Ahli Dewan Undangan Negeri (ADUN) Seri Muda, Shuhaimi Shafiei mendakwa pegawai kerajaan negeri Selangor turut bersubahat dengan pencuri pasir berikutan kegagalan kerajaan pakatan pembangkang menangani masalah kecurian pasir yang berleluasa di negeri itu. Beliau tidak menolak kemungkinan bahagian penguatkuasaan yang berkenaan juga terbabit dan tidak amanah dalam menjalankan tugas mereka sehingga menyukarkan usaha membanteras kecurian serta perlombongan pasir secara haram di beberapa kawasan di negeri itu. "Saya tidak mengatakan semua pegawai kerajaan negeri begitu, tetapi ada satu dua tempat kita telah kenal pasti dan tindakan akan diambil dengan mengubah beberapa posisi mereka supaya penguatkuasaan dilakukan lebih lancar. "Malah dalam sesetengah kes, apabila kita terima laporan kecurian pasir dan pergi ke kawasan berkenaan untuk mengambil tindakan, didapati semua aktiviti perlombongan telah dihentikan. Ini bermakna ada maklumat bocor," katanya.

Shuhaimi yang mewakili Parti Keadilan Rakyat (PKR) berkata demikian kepada pemberita selepas sesi taklimat media mengenai operasi perlombongan pasir di Selangor yang disampaikan oleh Pengarah Eksekutif Kumpulan Semesta Sdn. Bhd. (KSSB), Ir. Ramli Abd. Majed dan Pengerusi KSSB, Abdul Shukor Nagor di sini hari ini. Terdahulu, Shuhaimi bersama-sama Ramli dan Abdul Shukor membawa media meninjau kawasan dan operasi perlombongan pasir di sebuah lombong milik KSSB di kawasan mukim Tanjung 12, Kuala Langat yang didakwa terdapat kegiatan melombong secara tidak terkawal. Ramli pada taklimat media itu menafikan kedudukan lombong tersebut akan menjelaskan ekosistem atau mencemarkan kawasan air taman berkenaan kerana pihaknya telah menyediakan zon penampang di kawasan lombong itu sejauh 110 meter.

26 Julai 2010 (Isnin)

Khazanah berjaya dalam perebutan untuk ambil alih Parkway

KUALA LUMPUR 26 Julai - Fortis Healthcare Ltd. memutuskan untuk melupuskan keseluruhan 25.37 peratus kepentingan strategiknya dalam Parkway Holdings Ltd., dengan menerima tawaran awam sukarela pada S\$3.95 sesaham daripada Khazanah Nasional Bhd. Fortis dan Khazanah, yang menguasai 23.32 peratus kepentingan dalam Parkway, terlibat dalam perebutan untuk mengawal Parkway, sebuah kumpulan penjagaan kesihatan yang berpangkalan di Singapura, yang mengurus 16 hospital dengan lebih 3,400 katil di Asia. "Selepas berbincang secara mendalam, kami memutuskan untuk melupuskan pegangan strategik kami dalam Parkway. Keputusan untuk mengeluarkan pelaburan kami mengambil kira kepentingan semua pemegang saham dalam Fortis," kata Pengerusi Fortis dan Parkway, Malvinder Mohan Singh dalam satu kenyataan yang dikeluarkan di sini hari ini. Untuk tujuan itu, Fortis Healthcare, menerusi unitnya, Fortis Global Healthcare (Mauritius) Holdings Ltd., mencapai kata sepakat dengan Integrated Healthcare Holdings Ltd. (IHHL), sebuah unit tidak langsung Khazanah, untuk menerima tawaran umum sukarela yang disemak semula IHHL. Ia juga berkata, sempena persetujuan dengan Fortis untuk melakukan tender kepada IHHL, RHC Healthcare Pte. Ltd., yang dimiliki bersama oleh RHC Holding Pte. Ltd. dan Fortis Healthcare, telah menarik balik tawaran umum sukarela untuk Parkway Holdings berkuat kuasa serta merta.

27 Julai 2010 (Selasa)

Abdullah kesal isu pasir gagal ditangani pihak berkuasa

KUALA LUMPUR 27 Julai - Bekas Perdana Menteri, Tun Abdullah Ahmad Badawi kesal apabila aktiviti mengorek dan mencuri pasir yang semakin berleluasa kini masih gagal ditangani pihak berkuasa. Beliau yang juga Pengurus Institut Kefahaman Islam Malaysia (IKIM) berkata, kegagalan pihak berwajib menangani perkara itu sebenarnya telah memberi kesan buruk kepada alam sekitar. "Sepatutnya kegiatan seperti itu sudah dihentikan. Pihak penguat kuasa seharusnya mengambil tindakan tegas kalau nampak lori-lori yang bawa pasir dan siasat mereka," katanya. Beliau berkata demikian ketika berucap pada perasmian Persidangan Kesedaran Alam Sekitar dan Tindakan Demi Kebaikan Dunia anjuran IKIM di sini hari ini. Abdullah berkata, setiap individu juga perlu bertanggungjawab menjaga alam sekitar dan tidak hanya mengharapkan kepada kerajaan untuk melakukannya. "Anak-anak kita juga perlu diajar tentang betapa pentingnya menjaga alam sekitar. Mereka perlu sedar mengenai perlunya manusia hidup di dalam alam sekitar yang baik," katanya.

Dalam pada itu, seorang pembentang kertas kerja pada persidangan itu, Pengarah (Jabatan Teknikal) Jabatan Meterologi, Dr. Wan Azli Wan Hassan berkata, Malaysia akan terus mengalami peningkatan suhu terutamanya di sekitar bandar raya besar seperti di ibu negara. Katanya, walaupun trend peningkatan suhu yang berlaku di negara ini tidak tinggi iaitu sekitar 0.5 darjah Celsius setiap 10 tahun dan tidak dirasai oleh manusia, ia akan tetap memberi kesan kepada habitat dan alam sekitar. "Trend itu berlaku kerana aktiviti pembangunan di kawasan bandar yang terlalu pesat sehingga menyebabkan keadaan suhu terperangkap dan juga perubahan cuaca secara semula jadi seperti El Nino dan La Nina," katanya ketika membentangkan kertas kerja bertajuk *Perubahan Cuaca: Pengalaman Malaysia*. Beliau berkata peningkatan suhu yang paling ketara kini dapat dilihat berlaku di kawasan Lembah Klang memandangkan banyak aktiviti pembangunan yang dibuat. Menurutnya, sebagai negara maritim, Malaysia terdedah kepada ancaman perubahan cuaca yang disebabkan oleh keadaan alam semulajadi dan juga pemanasan global. Sehubungan itu katanya, semua pihak terutama masyarakat perlu mula bertindak menyelamatkan alam sekitar daripada menerima kesan-kesan buruk dalam jangka masa panjang.

27 Julai 2010 (Selasa)

PAC P.Pinang kesan 5 lubang aktiviti curi pasir

BALIK PULAU 27 Julai - Jawatankuasa Kira-kira Awam (PAC) Pulau Pinang yang melawat kawasan yang didakwa berlaku aktiviti mencuri pasir di Kampung Kenanga di sini hari ini mendapat wujud lima lubang kesan korekan pasir. Pengerusinya, Jagdeep Singh Deo yang juga Anggota Dewan Undangan Negeri (ADUN) Datuk Keramat berkata, PAC akan meminta Jabatan Ukur negeri menyiasat keluasan dan kedalaman lubang berkenaan. "Lawatan pertama hari ini mendapat ada sekurang-kurangnya lima lubang pelbagai saiz yang wujud kesan korekan pasir dan pagar di kawasan itu juga telah diceroboh. "PAC akan meminta pihak yang berkaitan terutama Jabatan Ukur negeri menyiasat perkara berkenaan dan membentangkan (hasil siasatan) semasa inkuiri yang bermula 2 Ogos ini," katanya kepada pemberita selepas melawat kawasan terbabit. Jagdeep berkata, PAC juga akan memanggil beberapa agensi kerajaan pada inkuiri untuk membantu mencari pihak yang bertanggungjawab dalam aktiviti mencuri pasir di kawasan itu.

Sementara itu pemilik tanah bersebelahan kawasan aktiviti mencuri pasir berkenaan, Ehsan Abdul Rahman mendakwa tiada lagi kelibat lori atau jengkaut di kawasan terbabit selepas perkara itu dilaporkan dalam media minggu lepas. "Sejak beberapa bulan lepas memang ada aktiviti mengorek dan keluarkan pasir di kawasan itu yang selalunya dijalankan antara pukul 2 atau 3 pagi. "Bagaimanapun selepas ia dilaporkan dalam media, tiada lagi kelibat lori keluar masuk atau jenGkaut mengorek pasir di situ," katanya. Minggu lepas, laporan akhbar mendedahkan tapak politeknik di Kampung Kenanga itu, diceroboh pencuri pasir. Menurut laporan itu, setiap malam berpuluhan-puluhan lori keluar masuk ke kawasan itu mengambil pasir untuk dihantar ke lokasi yang tidak dipastikan.

28 Julai 2010 (Rabu)

Subsidi RM9.9 bilion untuk klinik dan hospital kerajaan

KUALA LUMPUR 28 Julai - Kerajaan memberi subsidi RM9.9 bilion untuk penjagaan kesihatan individu yang disediakan di semua hospital dan klinik kerajaan pada tahun lepas, persidangan Dewan Negara diberitahu hari ini. Timbalan Menteri Kesihatan Datuk Rosnah Abdul Rashid Shirlin berkata sebanyak 98 peratus kos perkhidmatan kesihatan dan perubatan yang disediakan oleh semua fasiliti kesihatan kerajaan, termasuk hospital dan klinik adalah disubsidi oleh kerajaan. Beliau berkata bagaimanapun pihak kementerian tidak mempunyai maklumat berhubung jumlah subsidi kos rawatan untuk setiap pesakit klinik 1Malaysia, tetapi jumlah pesakit yang datang ke klinik 1Malaysia di seluruh negara setakat Ahad lepas adalah seramai 721,888 orang. Daripada jumlah pesakit yang datang mendapatkan rawatan di klinik 1Malaysia, kurang dari satu peratus terdiri daripada warga asing, katanya. "Bagi memastikan hanya rakyat Malaysia menikmati subsidi itu, mereka hanya dikenakan bayaran RM1 berbanding warga asing sebanyak RM15," katanya semasa menjawab soalan Senator Datuk Daljit Singh Dalliwal yang ingin tahu jumlah subsidi yang diterima setiap pesakit ke klinik 1Malaysia, dan bagaimana kerajaan memastikan subsidi tersebut hanya dinikmati warganegara Malaysia sahaja. - Bernama

29 Julai 2010 (Khamis)

KWSP perkenal pengeluaran perumahan fleksibel

KUALA LUMPUR 29 Julai - Kumpulan Wang Simpanan Pekerja (KWSP) memperkenalkan 'Pengeluaran Perumahan Fleksibel' untuk ahlinya yang belum lagi mengeluarkan simpanan untuk membeli rumah atau mengurangkan baki pinjaman perumahan. Ketua Pegawai Eksekutifnya, Tan Sri Azlan Zainol berkata, langkah memperkenalkan skim itu akan membolehkan ahli KWSP membeli rumah yang nilainya lebih tinggi. "Pengenalan skim ini juga sebagai menyokong objektif kerajaan untuk meningkatkan kualiti hidup rakyat sejajar dengan semangat 1Malaysia," katanya dalam kenyataan akhbar di sini hari ini. Menurutnya, skim baru itu juga tidak akan menjaskan simpanan persaraan ahli malah simpanan yang telah diasingkan itu akan terus menerima dividen tahunan KWSP. Beliau berkata, kemudahan itu terbuka kepada ahli yang belum berusia 54 tahun ketika permohonan dibuat. "Ia mesti dibuat bersama-sama dengan permohonan untuk pengeluaran membeli atau membina rumah atau mengurangkan baki pinjaman perumahan KWSP," katanya.

Jelasnya, bagi kemudahan itu, ahli boleh memindahkan sebahagian daripada simpanan Akaun 2 ke dalam akaun 'Pengeluaran Perumahan Fleksibel' dengan diikuti oleh pindaan amaun caruman bulanan yang ditetapkan ke dalam akaun perumahan tersebut. Kata beliau, simpanan yang telah diasangkan tidak boleh dikeluarkan bagi tujuan pengeluaran pra persaraan lain seperti perumahan, pendidikan, kesihatan dan umur 50 tahun sebelum tamat tempoh kemudahan pengeluaran ini. Bagaimanapun, katanya, ahli boleh menggunakan simpanan dalam Akaun 2 jika masih mempunyai baki untuk pengeluaran pra persaraan lain. "Setiap permohonan perlu dikemukakan oleh ahli sendiri kepada institusi kewangan di mana mereka memohon pinjaman perumahan tersebut," katanya. Tambahnya, borang permohonan itu kemudiannya akan dihantar kepada KWSP oleh ibu pejabat institusi kewangan yang mengambil bahagian. Azlan berkata, setakat ini hanya Maybank dan Public Bank yang telah mengesahkan penyertaan mereka.

30 Julai 2010 (Jumaat)

Syarikat pasir bakal saman ahli MPSP RM5j

NIBONG TEBAL 30 Julai - Syarikat perlombongan pasir, Foon Cent Sdn. Bhd. yang beroperasi di Jalan Tasek, Valdor di sini akan menyaman lima ahli Majlis Perbandaran Seberang Perai (MPSP) sebanyak RM5 juta kerana didakwa mengeluarkan kenyataan palsu mengenai operasi syarikat itu. Pengurus projeknya, Kamaruddin Harun berkata, keputusan siasatan kerajaan negeri baru-baru ini yang mengesahkan operasi perlombongan pasir di kawasan itu dijalankan secara sah membuktikan kenyataan ahli MPSP terbabit sebelum ini adalah tidak benar. "Kenyataan ahli MPSP terbabit mendatangkan pelbagai implikasi negatif malah tindakan MPSP menyita tapak projek menyebabkan kami menanggung kerugian kira-kira RM200,000 kerana tidak dapat beroperasi sehingga kini. "Pihak syarikat sudah melantik peguam dan sedang meneliti bukti-bukti bagi mengukuhkan dakwaan. Buat masa ini kita sedang menimbang untuk menyaman mereka sekurang-kurangnya RM5 juta," katanya pada sidang akhbar di sini hari ini. Lima ahli MPSP diketuai oleh Goh Choon Aik yang meninjau tapak projek berkenaan sebelum ini telah mendakwa syarikat tersebut yang mengusahakan perlombongan serta aktiviti mencuci pasir di situ sejak Julai 2008 telah beroperasi secara haram. Jawatankuasa penyiasat yang diwujudkan kerajaan negeri baru-baru ini bagaimanapun mengumumkan operasi mencuci pasir di kawasan berkenaan tidak melanggar syarat MPSP seperti yang didakwa.

Sementara itu, Kamaruddin memberitahu, pihaknya juga menimbang untuk mengambil tindakan undang-undang terhadap Pejabat Tanah dan Daerah Seberang Perai Selatan (SPS) berhubung permohonan mengeluarkan tanah dari kawasan yang diwartakan sebagai tanah bukit. Beliau berkata, kenyataan pejabat tersebut yang mendakwa syarikatnya tidak mendapat kelulusan menjalankan kerja-kerja di kawasan terbabit menggambarkan seolah-olah pihaknya tidak membuat sebarang permohonan sebelum ini. "Kami ada membuat permohonan pada April 2008 tetapi sehingga kini tiada maklum balas diterima sama ada permohonan itu diluluskan atau sebaliknya, sedangkan proses (permohonan) sepatutnya memakan masa hanya lapan minggu. "Kalau ini mahu dijadikan isu untuk meletakkan kesalahan kepada kami, pihak pejabat tanah perlu menjelaskan kewujudan aktiviti penternakan babi bersebelahan tanah kami yang turut tertakluk dengan Akta Tanah Bukit 1960 tetapi dibiarkan beroperasi," ujarnya lagi. Dalam hal ini jelas beliau, pihak pentadbir tanah daerah itu tidak wajar bersikap pilih bulu dengan mengambil tindakan kepada syarikat tertentu sahaja tetapi pada masa sama membiarkan pihak lain melanggar peraturan yang ditetapkan.

30 Julai 2010 (Jumaat)

PKFZ: Ada lagi VIP didakwa?

Oleh ASSIM HASSAN jenayah@utusan.com.my

KUALA LUMPUR 30 Julai - Mungkinkah ada lagi 'jerung' yang akan dihadapkan ke mahkamah berhubung skandal Zon Bebas Pelabuhan Klang (PKFZ), selepas bekas Menteri Pengangkutan, Tun Dr. Ling Liang Sik didakwa semalam? Jawapannya ada! Selepas lima individu termasuk Liang Sik dihadapkan ke mahkamah berhubung skandal ini, beberapa lagi orang kenamaan (VIP) dijangka diheret ke mahkamah atas kes yang sama. Menurut sumber, beberapa nama VIP yang masih dan pernah memegang jawatan penting hanya menunggu masa untuk didakwa berhubung skandal yang sama. Bagaimanapun, keputusan untuk mendakwa individu terbabit di mahkamah hanya akan ditentukan oleh pihak Peguam Negara. "Selepas Liang Sik, ada lagi ahli politik atau bekas ahli politik yang akan diheret ke mahkamah berhubung skandal ini. "Apa pun, biar pihak Peguam Negara yang tentukan," katanya ketika dihubungi *Utusan Malaysia* di sini hari ini.

Akhir tahun lalu, bekas Pengurus Besar Lembaga Pelabuhan Klang (LPK), Datin Paduka Oi Choo Phang dan tiga lagi didakwa melakukan pecah amanah dan menipu dengan membuat tuntutan palsu. Projek PKFZ, yang dibina di kawasan seluas 405 hektar di Pulau Indah dekat Pelabuhan Barat, Pelabuhan Klang, sebagai hab penghantaran kargo bersepadu menimbulkan kontroversi apabila kosnya melambung daripada RM2 bilion kepada RM4.6 bilion. Ia mengandungi 256 hektar kawasan terbuka untuk kilang/gudang, 512 lot perindustrian ringan dan 500,000 kaki persegi ruang pejabat untuk sewaan, 135-bilik hotel dan sebuah pusat pameran. Jawatankuasa Kira-Kira Wang Negara (PAC) yang menyiasat projek itu mencadangkan supaya Suruhanjaya Pencegahan Rasuah Malaysia (SPRM) dan polis menyiasat bekas Menteri Pengangkutan, Tan Sri Chan Kong Choy dan Phang kerana pecah amanah. Selain Phang, tiga lagi yang didakwa ialah Ketua Pegawai Operasi Kuala Dimensi Sdn. Bhd. (KDSB), Stephen Abok, 51; Seng Swee, 48, dari syarikat perunding BTA Architect serta bekas pengurus projek syarikat kontraktor pembangunan PKFZ, Law Jenn Dong, 51.